

四庫全書

子部

欽定四庫全書

子部

北夢瑣言卷八

六至

詳校官編修

臣曹振鏞

侍讀臣孫球覆勘

總校官原任中允臣王燕緒

校對官庶吉士臣翟槐

謄錄監生臣孫潢

欽定四庫全書

北夢瑣言卷六

唐 孫光憲 撰

吳相事

劉漢宏附

唐李紳性剛直在中書與李衛公相善為朋黨者切齒
鎮淮海曰吳相為江都尉時有零落衣冠顏氏女寄寓
廣陵有容色相國欲納之吳相強委禽焉於是大怒因
其婚娶時財聘甚豐若羅織執勘准其俸料之外有陳

設之具坐臧奏而殺之懲無禮也宣宗初在民間備知其屈登極後與二李不叶者導而進狀訴寃衛公以此出官朱崖路由澧州謂寄寓朝士曰李二十誤我也馬植曾為衛公所忌出為外任吳湘之事鞠於憲臺扶風時為中憲得行其志焉吳湘乃澧州人顏尋歸澧陽孀獨而終舊說浙東難理十分公事紳相曉得五六唯劉漢宏曉得七分其他廉使及三四而已蓋公之才難得也已

裴相生於于闐國事

雙峯禪師文如海道士附

唐裴相公休留心釋氏精於禪律師圭峯密禪師得達
摩頓門密師注法界觀禪詮皆相國撰序常被毳衲於
歌妓院持鉢乞食自言曰不為俗情所染可以說法為
人每發願世世為國王宏護佛法後于闐國王生一子
手文有相國姓字聞於中朝其子弟欲迎之彼國勅旨
不允也 雙峯禪師聚徒千人談玄之盛無能及也一
旦惑於民女而敗道焉是知淫為大罰信矣相國李公

尉始與師善為致一宰而已 道士文如海注莊子文
詞浩博懇求一尉與夫湯惠休廖廣宣旨趣共卑也惜
哉

韋氏女配劉謙事

丞相韋公宙出鎮南海有小將劉謙者職級甚卑氣宇
殊異乃以從猶女妻之其內以非我族類慮招物議諷
諸幕寮請諫止之丞相曰此人非常流也他日吾子孫
或可依之謙以軍功拜封州刺史韋夫人生子曰隱曰

巖隱為廣帥巖嗣之奄有嶺表四府之地自建號曰漢
改名龔在位經二紀而終次子嗣即京兆知人之鑒非
謬也

田布尚書傳

唐通義相國崔魏公鉉之鎮淮揚也盧丞相耽罷浙西
張郎中鐸罷常州俱過維揚謁魏公公以暇日與二客
私款方奕有持狀報女巫與田布尚書偕至泊逆旅某
亭者公以神之至也甚異之俄而復曰顯驗與他巫異

請改舍於都候之廨署公乃趣召巫者至至乃與神遇
拜曰謝相公公曰何謝神曰布有不肖子黷貨無厭郡
事不治當犯大辟賴相公陰德免焉使布之家廟血食
不絕者公之恩也公矍然曰異哉某之為相也未嘗以
機密損益於家人忽一日夏州節度使奏銀州刺史田
鐵犯贓罪私造鎧甲以易市邊馬布帛帝赫然怒曰贓
罪自別議且委以邊州所宜防盜以甲資敵非反而何
命中書以法論將盡赤其族翌日從容謂上曰鐵贓罪

自有憲章然是宏正之孫田布之子宏正首以河朔請

詰

一作

朝覲奉吏員布亦繼

一作然

父之款布會征淮西繼

以忠孝伏劒而死今若行法論罪以固邊圉未若因事
宏貸激勸忠烈上意乃解止黜授遠郡司馬而某未嘗
一出口於親戚私昵已將忘之今神之言正是其事乃
命廊下表而見焉公謂之曰君以義烈而死奈何區區
為愚婦人所使乎神憮然曰某常負此嫗八十萬錢今
方忍耻而償之乃宿債爾公與二客及監軍使幕下共

償其未足代付之自言事不驗神乃辭去梁相國李公
琪傳其事且曰嗟乎英特之士負一女子之債死且如
是而況於負國之大債乎竊君之祿而不報盜君之柄
而不忠豈一作宜其未得聞於斯論耶一作也而崔相國出
入將相殆三十年也宜哉

李太尉請脩狄梁公廟事

李德裕太尉未出學院盛有詞藻而不樂應舉吉甫相
俾親表勉之掌武曰好騾馬不入市由是以品子叙官

也吉甫相與武相元衡同列事多不叶每退公詞色不
懌掌武啟白曰此出之何難乃請脩狄梁公廟於是武
相漸求出鎮智計已聞於早成矣愚曾覽太尉三朝獻
替錄真可謂英才竟罹朋黨亦獨秀之所致也

同昌公主事

宣宗希冀遐齡無儲嗣宰臣多有忤旨者懿宗藩邸常懷危慄後郭美人誕育一女未踰月卒適值懿皇傷憂之際皇女忽言得活登極後鍾愛之封同昌公主降韋

保衡恩澤無比因有疾湯藥不效而殞醫官韓宗昭康
守商等數家皆族誅劉相國瞻上諫懿皇不聽懿皇嘗
幸左軍見觀音像陷地四尺問左右對曰陛下中國之
天子菩薩即邊地之道人上悅之寇入京郭妃不及奔
赴行在乞食於都城時人乃嗟之

同昌公主奢華事
見蘇鶚杜陽雜編

侯昌業表

唐自廣明後閹人擅權置南北廢置使軍容田令孜有
回天之力中外側目而王仙芝黃巢剽掠江淮朝廷憂

之左拾遺侯昌業上疏極言時病留中不出命於仗內
戮之後有傳侯昌業疏詞不合事體其末云請開謁諦
道場以消兵厲似為庸僧偽作也必若侯昌業以此識
見犯上宜其死也

李常侍遇道術

隴西李涪常侍福相之子質氣古淡一作泊光化中與諸

朝士避地梁川小貂日游鄰寺以散鬱陶寺僧有爽公
者因與小貂相識每晨他出或赴齋請荀小貂在寺即

不局鑠其房請其宴息久而彌篤乃曰李常侍在寺爭忍闔扉乎或一日從容謂小貂曰世有黃白之術信乎好之乎貂曰某雖未嘗留心安敢不信又安敢輒好僧曰貧道之每拂曙出寺為脩功德因緣也仰常侍德豈敢秘惜小貂辭遜再三竟得其術爾後最受三峯胡相國及崔相恩知每遇二公載誕之辰乃獻銀藥孟子此外雖家屢空終不自奉亦不傳於子孫遂平宰李璩乃嫡孫也嘗為愚話之廣成杜光庭先生常云未有不脩

道而希得仙術苟得之必致禍矣唯名行謹潔者往往得之即李貂之謂也

陸相公勸酒事

朱進士酒狂東臯子劉虛白附

陸相袞出典夷陵時有士子脩謁相國與之從容因命酒勸此子辭曰天性不飲酒相國曰誠如所言已校五分矣蓋平生悔吝若有十分不為酒困自然減半也

朱秀才慶餘遂寧府人舉進士有楊貴妃別明皇賦最佳然狂於酒隴州防禦使鞏咸乃蜀將也朱生以鄉人

下第謁之輩亦使酒新鑄一劍乃曰如何得一漢試之
朱便引頸俄而身首異處惜哉死非其所即陸公之戲
誠哉善言也 東臯子王勣字無功有杜康廟碑醉鄉
記備言酒德竟陵人劉虛白擢進士第嗜酒有詩云知
道醉鄉無戶稅任他荒却下丹田世之嗜酒者苟為孔
門之徒得無違告誡乎

裴鄭立襄王事

唐僖宗再幸梁洋朱玫立襄王宰相蕭遘裴澈鄭匡圖

等同奉之洎破僞主而僖皇反正裴鄭等皆罹大辟始具兵衛四圍矛槩森然裴相猶戲曰天子之牆數仞也蕭邁相就河中賜毒握之在手自以主上舊恩希貶降久而毒爛其手竟飲之而終

田軍容檄韋太尉

唐太尉韋公昭度舊族名人位非忝竊而沙門僧澈承恩為人潛結中禁京兆與一二時相皆因之大拜悟達國師知元乃澈之師也嘗鄙之諸相在西川行在每謁

悟達皆申跪禮國師揖之請於僧澈處喫茶後掌武伐
成都田軍容致檄書曰伏以太尉相國頃因和尚方始
登庸在中書則開鋪賣官居翰苑則借人把筆蓋謂此
也

朱李驟進

唐李師望乃諸宗屬也自負才術欲以方面為己任因
旅游邛蜀備知南蠻之勇怯遂上書希割西川數州於
臨邛郡建定邊軍節度詔旨允之乃自鳳翔少尹擢領

此任于時西川大將嫉其分裂巡屬乃陰通

一作南詔
致意

於是蠻軍為近界鄉豪所導侵軼蜀川元戎竇滂不能

遏截師望亦尋受貶黜隴西

又云因任
華陽捕賊

光化中朱朴

自毛詩博士登庸恃其口辯可以立致太平由藩邸引
導聞於昭宗遂有此拜對敷之日面陳時事數條每言

臣為陛下致之洎操大柄無以施展自是恩澤日衰中

外騰沸內優曰俳優穆刀陵作念經行者至御

一作前
獅

曰若是朱相即是非相翌日出官時人曰拔士為相自

古有也君子

此一作

不恥其言之不出恥躬之不逮況唐

末喪亂天下阻兵雖負奇才不能謀畫而朱公一儒生
以區區辯給欲整其亂祇自取辱焉涓縷未申而教樂
僮吹簞篳甚為識者所責也

李羣玉輕薄事

韋沆李璵附

唐李羣玉校書字文山澧州人有詩名散逸不樂應舉
親友強之一上而已嘗受知於相國河東裴公休為其
延譽因進詩授弘文館校書終於荆襄間然多狎酒徒

疑其為張祜之流李少逢善夷謫官澧陽備知其行止
因為紀之乃清介高節之人非輕率之士疑為同人所
謗或曰曾為荆之幕下假書題謁澧吏父使君李謂父
侯曰小子困甚幸使君痛救之州將以一作戒其輕脫所
濟不厚也又近年京兆韋沆者衣纓舊族亦攻古文流
落不偶而沒於世隴西李璩乃福相之曾孫也常宰襄
州鄉樂縣京兆僑于是邑常來干擾李亦祇奉不厭一
旦謂李宰曰客有相勉且求一邑以救饑寒室人聞之

大怒曰人喚郎為長官即得喚我作長官夫人即不可
隴西聞而鄙薄亦笑亦怒也

以歌詞自娛

蜀相韋莊晉相和凝附

先是李遠以曾有詩云人事三盃酒流年一局碁唐宣
宗以其非牧人之才不與郡守宰相為言然始俞允

蜀相韋莊應舉時遇黃冠犯闕著秦婦吟一篇內一聯
云內庫燒為錦繡灰天街踏盡公卿骨爾後公卿亦多
垂訝莊乃諱之時人號秦婦吟秀才他日撰家戒內不

許垂秦婦吟障子以此止謗亦無及也 晉相和凝少
年時好為曲子詞布於汴洛洎入相專託人收拾焚毀
不暇然相國厚重有德終為艷詞玷之契丹入夷門號
為曲子相公所謂好事不出門惡事行千里士君子得
不戒之乎

又云長日唯消一局碁兩存之

劉蛻奏令狐相

宣宗以政事委相國令狐公君臣道契人無間然劉舍
人每訐其短密奏之宣宗留中但以其事規於相國而

不言其人姓名其間以丞相子拔解就試疏略云號曰
無解進士其實有耳未聞云云又以子弟納財賄疏云
白日之下見金而不見人云云丞相憾之乃俾一人為
其書吏謹事之紫微託以腹心都不疑慮乃為一經業
舉人致名第受賂十萬為此吏所告由是貶之君子曰
彭城公將欲律人先須潔己安有自負贓污而發人之
短乎宜其不躋大位也先是令狐相自以單族每欲繁
其宗黨與崔盧抗衡凡是富家率皆引進皇籍有不得

官者欲進狀請改姓令孤時以此少之

陸龜蒙追贈

薛許州附

唐吳郡陸龜蒙字魯望舊名族也其父賓虞進士甲科
浙東從事侍御史家于蘇臺龜蒙幼精六籍弱冠攻文
與顏蕘皮日休羅隱吳融為益友性高潔家貧思養親
之祿與張博為吳興廬江二郡倅著吳興實錄四十卷
松陵集十卷笠澤叢書五卷丞相李公尉廬公攜景重
之羅給事寄陸龜蒙詩云龍樓李丞相昔歲仰高文黃

閣今無主青山竟不焚蓋嘗有徵聘之意唐末以左拾遺授之詔下之日疾終光化三年贈右補闕吳侍郎融傳貽史右補闕韋莊撰誄文相國陸希聲撰碑文給事中顏蕘書皮日休博士為詩皮冠死浙中方干詩名著於吳中陸未許之一旦頓作詩五十首裝為方干新製時輩吟賞降仰陸謂曰此乃下官效方干之作也方詩在模範中爾奇意精識者亦然之薛許州能以詩道為己任還劉德仁卷有詩云百首如一首卷初如卷終

譏劉不能變態乃陸之比也

顏給事墓銘

顏給事堯謫官沒於湖外嘗自草墓誌性躁急不能容物其誌詞云寓于東吳與吳郡陸龜蒙為詩論之交一紀無踰龜蒙卒為其就木至穴情禮不缺其後即故諫議大夫高公丞之故丞相陸公扈二君於堯至死不變其餘面交皆如攜手過市見利即解攜而去莫我知也復有吏部尚書薛公貽矩兵部侍郎于公兢中書舍人

鄭公撰三君子者余今日已前不變不知異日見余骨肉孤幼復如何哉

李磻行狀

梁補闕附

司空圖侍郎撰李公磻行狀以公有出倫之才為時輩妬忌懼於非橫其平生著文有百家著諸心要文集三十卷品流誌五卷易之心要三卷注論語一部明無為上下二一作三篇義說一篇倉卒之辰焚於賊火時人無所聞也惜哉陽春白雪世人寡和豈虛言也葆光子曰

唐代韓愈柳宗元洎李翱李觀皇甫湜數君子之文陵
轢荀孟稊批顏謝其所宗仰者唯梁浩補闕而已乃諸
人之龜鑑而梁之聲采寂寂豈陽春白雪之流乎是知
俗譽喧喧者宜鑒其濫吹也

白太傅墓誌

盧鄭二相附

白太傅與元相國友善以詩道著名時號元白其集內
有詩輓元相云相看掩淚俱無語別後傷心事豈知想
得咸陽原上樹已抽三丈白楊枝洎自撰墓誌云與彭

城劉夢得為詩友殊不言元公時人疑其隙終也鄭
文公旼與盧相攜親表也閱閱相齊詞學相均同在中
書因公事不叶揮霍間言語相擠詬不覺硯瓦翻潑謂
宰相關擊亦不然也竟以此出官矣

內官改創職事

實給事附

古者閹官擅權專制者多矣其間不無忠孝亦存簡編
唐自安史已來兵難薦臻天子播越親衛戎柄皆付大
閹魚朝恩竇文場乃其魁也爾後置左右軍十二衛觀

軍容處置樞密宣徽四院使擬於四相也十六宮使皆
宦者為之分卿寺之職以權為班行備員而已供奉官
紫綬入侍後軍容使楊復恭俾其欄笏宣導自弘農改
作也嚴遵美內謁之最良也嘗典戎唐末致仕居蜀郡
鄙叟庸夫時得親狎其子仕蜀至閤門使曾為一僧致
紫袈裟僧來感謝書記所謝之語於掌中方屬炎天手
汗模糊文字莫辨折腰一作行膝而趨汗流喘乏只云伏以
軍容寂無所道抵掌視之良久云貌寢人微凡事無能

嚴公曰不敢退而大哈嚴公物故蜀朝冊贈命給事中
竇雍堅不承命雖偏霸之世亦不苟且士人多之

羅顧升降方干附

唐羅給事隱顧博士雲俱受知於相國令狐公顧雖齟
齬之子而風韻詳整羅亦錢塘人鄉音乖刺相國子弟
每有宴會顧獨與之丰韻談諧莫辨其寒素之士也顧
文賦為時所稱而切於成名嘗有啟事陳於所知只望
丙科盡處竟列名於尾株之前也

令狐召學士話於梁
震先輩愚於梁公處

聞羅既頻不得意未免怨望竟為貴子弟所排契濶東
歸黃冠事平朝賢議欲召之韋貽範沮之曰某曾與之
同舟而載雖未相識舟人告云此有朝官羅曰是何朝
官我腳夾筆可以敵得數輩必若登科通籍吾徒為秕
糠也由是不果召詩人方干亦吳人也王龜大夫重
之既延入內乃連下兩拜亞相安詳以答之未起間方
又致一拜時號方三拜也

李琪書樹葉

梁李相國琪唐末以文學策名仕至御史昭宗播遷衣冠蕩析因與弘農楊玢藏跡於荆楚間楊即源蜀琪相盤桓於夷道之清江自晦其迹號華原李長官其堂兄光符宰宜都嘗厭薄之琪相寂寞每臨流踞石摘樹葉而試草制詞吁嗟快悵而投於水中梁祖受禪徵入拜翰林學士尋登廊廟爾後宜都之子彬羈旅渚宮因省相國乃數厭父之所短而遣之矣

杜荀鶴入翰林

平曾賈島附

唐杜甫鶴嘗游梁獻太祖詩三十章皆易曉也因厚遇之洎受禪拜翰林學士五日而卒朱崖李太尉獎拔寒俊至於掌誥率用子弟乃曰以其諳練故事以濟緩急也如京兆者一篇一詠而已經國大手非其所能幸而殂逝免貽伊恥也制貶平曾賈島以其僻澀之才無所采用皆此類也

樂工關小紅

石淙附

唐昭宗劫遷百官蕩析名娼伎兒皆為強諸侯有之供

奉彈琵琶樂工號關別駕小紅者小名也梁太祖求之
既至謂曰爾解彈陽下采桑乎關伶俗而奏之及出又
為親近者俾其彈而送酒由是失意不久而殂復有琵
琶石淙者號石司馬自言早為相國令狐公見賞俾與
諸子渙涓連水邊作名也亂後入蜀不隸樂籍多游諸
大官家皆以賓客待之一日會軍校數員飲酒石淙以
胡琴擅場在坐非別音者諠譁語笑殊不傾聽淙乃撲
槽而詬曰某曾為中朝宰相供奉今日與健兒彈而不

蒙我聽何其苦哉于時識者亦歎訝之喪亂以來冠履顛倒不幸之事何可勝道豈獨賤伶云乎哉

孫內子

蕭惟香附

唐樂安孫氏進士孟昌期之內子善為詩一旦併焚其集以為才思非婦人之事自是專以婦道內治孫有代夫詩贈人白蠟燭曰景勝銀釭香比蘭

一作自古清一香勝蕙蘭

條白玉逼人寒他時紫禁春風夜醉草天書仔細看又聞琴詩曰玉指朱絃軋復清湘妃愁怨最難聽初疑颯

颯涼風動又似蕭蕭暮雨零近若流泉來碧嶂遠如玄
鶴下青冥夜深彈罷堪惆悵霧濕叢蘭月滿庭又代謝
崔家郎君酒詩曰謝將清酒寄愁人澄澈甘香氣味真
好是綠窓明月夜一盃搖蕩滿懷春又台州盤嶺村有
一婦人蕭惟香有才思未嫁於所居牕下與進士王元
宴相對因奔瑯琊復淫冶不禁王舍於逆旅而去遂私
接行客託身無所自經而死店有數百首詩所謂才思
非婦人之事誠然也哉聞於劉山甫

北夢瑣言卷六

欽定四庫全書

北夢瑣言卷七

唐 孫光憲 撰

孟浩然趙嘏以詩失意

唐襄陽孟浩然與李太白交游玄宗徵李入翰林孟以故人之分有彈冠之望久無消息乃入京謁之一日玄宗召李入對因從容說及孟浩然李奏曰臣故人也見在臣私第上令急召賜對俾口進佳句孟浩然誦詩曰

北闕休上書南山歸敝廬不才明主棄多病故人疎上
意不悅乃曰未曾見浩然進書朝廷退黜何不云氣蒸
雲夢澤波撼岳陽城緣是不降恩澤終於布衣而已宣
宗索趙嘏詩其卷首有題秦皇詩其略云徒知六國隨
斤斧莫有羣儒定是非上不悅

或云孟郊王維於
翰林令兩存之

鄭綮相詩

李程附

唐相國鄭綮雖有詩名本無廊廟之望常典廬州吳王
楊行密為本州步奏官因有遺闕而答責之然其儒懦

清慎弘農常重之昭宗時吳雄據淮海朝廷務行姑息

因

一作恩

盛言鄭公之德由是登庸中外驚駭于時皇綱

已紊四方多故相國既無施展事必依違太原兵至渭
北天子震恐渴於攘却之術相國奏對請於文宣王謚
號中加一哲字其不究時病率此類也同列以其忝竊
每譏侮之相國乃題詩於中書壁上其詞曰側坡蛆蛄
崙蟻子競來拖一朝白雨下無鈍無嚙囉意者以時運
將衰縱有才智亦不能康濟當有玉石俱焚之慮也時

亦然之相國題老僧詩云日照西山雪老僧門未開凍
鉗粘柱礎宿火焰爐灰童子病歸去鹿麕寒入來常云
此詩屬對可以稱衡重輕不偏也或曰相國近有新詩
否對曰詩思在灞橋風雪中驢背上此處何以得之蓋
言平生苦心也 李程以日五色賦擢第為河南尹日
試舉人有浩虛舟行卷中日五色賦程相大驚慮掩其
美伸覽之次服其才麗至末韻侵晚水以芒動俯寒山
而秀發程相大哈曰李程賦且在瑞日何為到夜秀發

由是浩賦不能陵邁

來鵬詩

沈光楊敬之附

唐進士來鵬詩思清麗福建韋尚書岫愛其才曾欲以子妻之而後不果爾後游蜀夏課卷中有詩云一夜綠荷風剪破賺他秋雨不成珠識者以為不祥是歲不隨秋賦而卒於通議郎 前進士沈光有洞庭樂賦韋八座岫謂朝賢曰此賦乃一片宮商也後辟為閩從事

弘農楊敬之撰華山賦朱崖李太尉每置座右行坐諷

之其略云見若咫尺田千畝矣見若環堵城千雉矣見若杯水池百里矣見若蟻垤室九層矣醯雞往來周東西矣蠛蠓紛紜強秦去矣蜂巢聯聯構阿房矣俄而復然立建章矣小星奕奕焚咸陽矣累累璽粟祖龍藏矣其十一一作干載改更興一作與懷悲愁辛苦循其上矣楊氏華陰

之茂族冠蓋甚遠此乃寄意於華山而言世事實雄才也

李學士賦識 劉昌美勾偉附

唐乾寧中劉昌美典夔州時屬夏潦峽漲湍險俚俗云

艷潏大如馬瞿塘不可下於是行旅輟棹而候水平

一作

濟

去焉有朝官李堯學士挈家自蜀沿流將之江陵郡

牧以水勢正惡且望少駐以圖利涉隴西忽遽殆

一作若

為人所

一作之

促召堅請東下不能止之才鼓行橈長揖

而別州將目送之際盤渦呀裂破其船而倒李

一作卓

家溺死焉

或云一行船次共一百二十人皆溺死

唯妳嫗一人隔夜為駭

浪推送江岸而蘇先是永安監竈戶陳小奴掉空船下

瞿塘見崖下有一人裹四縫帽穿白缺衫阜義襴青袴

執鐵蒺藜問李公之行邁自云迎候其姝嫗蘇後亦說
於刺史云李學士至一官署上廳事朱門白壁寮吏參
賀又聞云此行無姝嫗名遂送出水濱于時具以其事
奏聞自後以瞿塘為水府春秋祭之初隴西文賦中有
金釵墜井賦至是識焉世傳云人之正直死為冥官道
書云酆都陰府官屬乃人間有德者卿相為之亦號陰
仙近代朱崖李太尉張讀侍郎小說咸有判冥之說
劉昌美兩典夔州雲安縣僧元悟曾有蜀川將校王尚

書者舍己俸三百千以脩觀音堂

此像有靈矣

乃剩三十千

入己一旦物故經七日鄰於腐壞忽然再蘇灌湯藥以

輔之言曰初至一官曹見劉行軍

即昌美也

說云何乃侵用

功德錢以舊曾相識放歸須還此錢元悟乃戒門人鬻衣鉢而償之尋復卒也西川孔目官勾偉於其輩最

號廉直綿竹縣民王氏子病困入冥因復還魂見冥官謂曰我即勾孔目也家在成都西市曾負人錢三萬未償汝今歸去為我言於家人也王生後訪勾氏子仍以

債主姓名言之果為酬還

盧詩三遇

唐盧延讓業詩二十五舉方登一第卷中有句云狐衝

官道過狗觸

一作判

店門開租庸張濬

一作相

親見此事每

稱賞之又有餓猫臨鼠穴饒犬舐魚砧之句為成中令

洵見賞又有栗爆燒瓊破猫跳觸鼎翻句為王先王建

所賞嘗謂人曰平生投謁公卿不意得力於猫兒狗子

也人聞而笑之盧嘗有詩云不同文賦易為是者

一作著

之乎復

一作後

入翰林閣筆而已同列戲之曰不同文賦

易為是者之乎竟以不稱職數日而罷也

李流行文卷

皮日休莊布附

唐晉相李洸礪相之子也文學淵奧迴出輩流于時公相之子弟無能及者應舉時文卷行明易先生書又有答明易先生書朝士覽之不測涯涘即其他文章可知也然恃才躁進竟罹非禍爾後礪相追雪贈太子太師謚曰文司空圖撰行狀洸贈禮部員外郎先是劉崇龜

舍人撰礪相麻因而貶黜流以大彭

一作彰

先世因贓仰

藥撰鸚鵡杯賦李流酬詞云玉犬吠天關彩童哭仙吏

一封紅篆書為奏塵寰事八極鼇柱傾四溟龍鬣沸長

庚冷有芒文曲淡無氣烏輪不再中黃沙瘞腥鬼請帝

命真官臨雲啟金匱方與清華宮重正紫極位曠古雨

露恩安得借

一作惜

沾施生人血欲盡欃槍無飽意甚有

文義焉又皮日休曾謁歸融尚書不見因撰夾蛇龜賦

譏其不出頭也而歸氏子亦撰皮靴鞋賦遞相謗諑皮

生後為湖南軍倖亦甚傲誕自號間氣布衣莊布以長書責之行於世也

鄭準集軍書

唐滎陽鄭準以文筆依荊州成中令常欲比肩陳阮自集其所作為三卷號劉表軍書雖有胸襟而辭體不雅至祝朝貴書云中書令舍人曰草麻通事舍人曰奏可又賀襄州趙令嗣襲其書云不沐浴佩玉而有祁兆不登山取符而無恤封是於慶賀中顯言其庶賤也鄰道

之敬其若是乎應舉日詩卷題水牛曰護犢橫身立逢人揭尾跳朝士以為大笑

鄭準譏陳詠

唐前朝進士陳詠眉州青神人有詩名善奕棊昭宗劫遷駐蹕陝郊是歲策名歸蜀韋書記莊以詩賀之又有鄉人拓善者屬和韋詩其略云讓德已聞多士伏沽名還得世人聞譏其比滌器當壚也謬稱馮副使渭詩以渭多諧戲故也或云蜀之拓善者作此詩假馮公之名

也潁川嘗以詩道自負謁荆幕鄭準準亦自負雄筆謂
潁川曰今日多故不暇操染有三數處回紇祈為假手
潁川自旦及暮起草不就蓋欲以高之其詩卷首有一
對語云隔岸水牛浮鼻渡傍溪沙鳥點頭行京兆杜光
庭先生謂曰先輩佳句甚多何必以此為卷首潁川曰
曾為朝貴見賞所以刻於卷首章都是假譽求售使然
也

王超牋奏

石欽若許存附

唐末鳳翔判官王超推奉李茂貞挾曹馬之勢牋奏文
檄恣意翱翔王蜀先主初下成都馮涓節制判掌其奏
牋歲久轉廳以掌記辟韋莊郎中於權變之間未甚愜
旨閬州人王保晦有文才而無體式然其切露直致易
為曉悟加以鳳翔用王超牋奏超以一本舊族思偶風
雲每遇飛章言偽而辯蜀先主愛之以二王書題表藁
示長樂公公乃致書遜謝倍加贊賞其要曰有眼未見
有耳未聞蓋譏其阻兵恃強失事君去就王超後為興

元留後遇害有鳳鳴集三十卷行於世後又有名石欽
若者體效其筆為劉知俊判官隨軒降蜀不能謙退遠
害賓主爭露鋒穎竟同誅之閱其緘題表章行行然宜
其見忌而取禍也許存初背荊州成中令降蜀先主有
意殺之親吏柳脩業勸其謙靜每立大功而皆託疾由
是獲免於先主之世即彭城之舊寮不若高陽之小吏
矣一作也王超全集三十卷今只見三卷聞於廬鄉宏也

李商隱草進劔表

蜀庾傳昌顧雲附

李商隱員外依彭陽令狐公楚以牋奏受知相國危急
有寶劍嘗為君上所賜將進之命李起草不愜其旨因
口占云前件劍武庫神兵先皇特一作所賜既不合將歸

一作於

泉下又不宜留在人間時人服其簡當彭陽之子

緇繼有韋平之拜似疎隴西未嘗展分重陽日義山詣
宅於廳事上留題其略云十年泉下無消息九日樽前
有所思郎君官重施行馬東閣無因許再窺相國覩之
慚悵而已乃扃閉此廳終身不處也 蜀中庾傳昌舍

人始為永和府判官文才敏贍傷於冗雜因候相國張公有故未及見庾怒而歸草一啓事僅數十字授於謁者拂袖而去他日張相謂朝士曰庾舍人見示長牋不可多得雖然曾聞其草角觚牒詞動乃數幅譏其無簡當體要之用也

鈔本有尺有所短寸有所長向聞於古人也十四字

黃錄壇場

星辰備位顧雲博士為高燕公草齋詞云天靜則星辰可摘奇險之句施於至敬可乎唐末亂離渴於救時之術孔相國緯每朝士上封事不暇周覽但曰古今存亡

某知之矣未審所陳利害其要如何蓋鄙其不達變也
國子司業于晦曾上崔相國公允啓事數千字上至堯
舜下及隋唐一興一替歷歷可紀其末散漫殊非簡略
所以儒生中通變者鮮矣

裴晉公臨終進先帝所賜玉帶表文與令狐公事頗同未

知孰是舊朝士多云李義山草進劔表令狐公曰今日不暇多云信口占之

高崇文相國詠雪

唐高相國崇文本薊州將校也因討劉闢有功授西川
節度使一旦大雪諸從事吟賞有詩渤海鄙言多呼人

為髀兒

恐是
姣字

此日筵上謂賓客曰某雖武夫亦有一詩

乃口占云崇文崇武不崇文提戈出塞號將軍那個髀
兒射雁落白毛空裏落紛紛其詩著題皆謂北齊教曹
之比也太尉駢即其曾孫也鎮蜀日以蠻蜚侵暴乃築
羅城城四十里朝廷雖加恩賞亦疑其固護或一日聞
奏樂聲知有改移乃題風箏寄意曰夜靜絃聲響碧空
宮商信任往來風依稀似曲才堪聽又被移將別調中
旬日報到移鎮渚宮

洞庭湖詩

李洞包賀盧延讓顧況附

湘江北流至岳陽達蜀江夏潦後蜀漲勢高過住湘波
讓而退溢為洞庭湖凡濶數百里而君山宛在水中秋
水歸壑此山復居於陸唯一條湘川而已海為桑田於
斯驗也前輩許棠過洞庭詩最為首出爾後無繼斯作
詩僧齊己駐錫巴陵欲吟一詩竟未得意有都押衙者
蔡姓而忘其名戲謂己公曰題洞庭者某詩絕矣諸人
幸勿措詞己公堅請口劄押衙抑揚朗吟曰可憐洞庭

湖恰到三冬無髭鬚以其不成湖也諸僧大笑之進
士李洞慕賈島欲鑄而頂戴嘗念賈島佛而其詩體又
僻于賈復有包賀者多為麁鄙之句至於苦竹筍抽
青橛子石榴樹挂小瓶兒又云霧是山巾子船為水靽
鞋又云棹搖船掠鬢風動竹搥胸雖好事托以成之亦
空穴來風之義也 盧延讓哭邊將詩曰自是礪砂發
非干礪石傷牒多身上職益大背邊瘡人謂此是打脊
詩也世傳逸詩云牕下有時留客宿室中無事伴僧眠

號曰自落便宜詩 顧況著作披道服在茅山有一秀才行吟曰駐馬上山阿久思不得顧曰何不道風來尿氣多秀才云賢莫無禮顧曰是況其人慚惕而退僕早歲嘗和南越詩云曉厨烹淡菜春杼織種花牛翰林覽而絕倒莫喻其旨牛公曰吾子只知名安知淡菜非雅物也後方曉之學吟之流得不以斯為戒也

高蟾以詩策名

胡曾羅隱附

進士高蟾詩思雖清務為奇險意疎理寡實風雅之罪

人薛許州謂人曰倘見此公欲贈其掌然而落第詩曰
天上碧桃和露種日邊紅杏倚雲栽芙蓉生在秋江上
不向春

一作東

風怨未開蓋守寒素之分無躁競之心公

卿間許之先是胡曾有詩曰翰苑何時休嫁女文章早
晚罷生兒上林新桂年年發不許平人折一枝羅隱亦
多怨刺當路子弟忌之由是渤海策名也愚嘗覽李賀
歌詩篇慕其逸才奇險雖然嘗疑其無理未敢言於時
輩或於奇章公集中

奇章集中僧
孺給事中

見杜子微牧有言長

吉若使稍加其理即奴僕命騷人可也是知通論合符
不相遠也

韋杜氣槩

李頻附

杜荀鶴曾得一聯詩云舊衣灰絮絮新酒竹籊籊時韋
相國說右司員外郎寄寓荊州或語於韋公曰我道印
將金鑲鑲簾用玉鈎鈎即京兆大拜氣槩詩中已見之
矣或有述李頻詩於錢尚父曰只將五字句用破一生
心尚父曰可惜此心何所不用而破於詩句苦哉

梁震無祿

唐荆南節判司空董與京兆杜無隱即滑臺杜愔常侍之子洎蜀人梁震俱稱進士謁成中令欲希薦送有薛少尹者自蜀汭流至渚宮三賢嘗訪之一日薛尹亞謂司空曰閣下與京兆勿議求名必無所遂杜亦不壽唯大賢忽為人繫維官至朱紫如梁秀才者此舉必捷然登第後一命不沾也後皆如其言梁公却思歸蜀重到渚宮江路梗紛未及西泝淮師寇江陵渤海王邀至府

衙俾草檄書欲辟於府幕堅以不仕為志渤海敬諾之
二紀依棲竟麻衣也薛尹之言果驗耶

夏侯生說劉僕射事

廣南劉僕射崇龜常有台輔之望必謂罷政便期直上
羅浮處士夏侯生有道彭城重之因問將來之事夏生
言其不入相發後三千里有不測之事洎歸闕至中路
得疾而薨劉山甫亦蒙夏生言示五年行止事無不驗
蓋飲啄之有分也

曹相夢剃度

唐曹相國確判計亦有台輔之望或夢剃度為僧心甚惡之有一士占夢多驗相國召之具以所見語之

一作話

此人曰前賀侍郎旦夕必登庸出家者號剃度也無何杜相出鎮江西而相國大拜也

元德感

福建道以海口黃碕岸橫石巉峭常為舟楫之患閩王瑯邪王審知思欲制置憚於力役乾寧中因夢金甲神

自稱吳安王許助開鑿及覺話於賓寮因命判官劉山

甫躬往設

一作致

祭具述所夢之事三奠未終海內靈怪

具見山甫乃憩於僧院憑高觀之風雷暴興見一物非
魚非龍鱗黃鬣赤凡三日風雷止霽已別開一港甚便
行旅當時錄奏賜號甘棠港閩從事劉山甫乃中朝舊
族也著金溪間談十二卷愚嘗略得披覽而其本偶亡
絕無人收得海隅迢遞莫可搜訪今之所集云聞於劉
山甫即其事也十不記其三四惜哉

劉道濟幽牕夢

光化中有文士劉道濟止於天台山國清寺夢見一女
子引生入牕下有側柏樹葵花遂為伉儷後頻於夢中
相遇自不曉其故無何於明州奉化縣古寺內見一牕
側柏葵花宛是夢中所游有一客官人寄寓於此室女
有美才貧而未聘近中心疾而生所遇乃女之魂也蓋
女子及笄不有所歸乃父兄之過也又有彭城劉生夢
入一倡婦家與諸輩狎飲爾後但夢便及彼處自疑非

夢所遇之姬芳香常襲衣蓋心邪所致聞于劉山甫也

北夢瑣言卷七

欽定四庫全書

北夢瑣言卷八

唐 孫光憲 撰

李太尉與段少常書

唐李太尉德裕左降至朱崖著四十九論叙平生所志
嘗遺段少常成式書曰自到崖州幸且頑健居人多養
雞往往飛入官舍今且作祝雞翁爾謹狀吉甫相典忠
州沂流之任行次秭歸地名雲居臺在江中掌武誕於

此處小名臺郎以其地而命名也

孫僕射酌酒

裴迪附

唐孫會宗僕射即偓相大王父也宅中集內外親表開宴有一甥姪聞朝官後至及中門見緋衣官人衣襟前皆是酒污咄咄而出不相識洎即席說與主人咸訝無此官沈思之乃是行酒時於堦上酌酒草草傾潑也自此每酌酒側身恭跪一酌而已自孫氏始也今人三酌非也有裴迪者贅相之堂弟無文學於荆南投筆事

趙司徒為虞總小將對客側身一酌趙公未喻朝賢間風規極怪之答七下何不幸也

二朝士以名取戲

唐張昺尚書朝望既高號為流品與韋相保衡有分韋言於同列以其名昺昺訓袒衣也又詩云載衣之昺昺即小兒褌衣乃綳帶也方欲因事改之未幾韋相流貶竟不大拜韋嘗問立名之由昺以少孤為無學問親表所誤也後唐姚相名洎善談吐仍多辯捷表兄弟崔沂

侍郎戲之曰洎訓肉汁胡為名洎無以酬之然洎亦訓
至雖然古人以名貽誚者多矣妨事者有焉至如仙客
仙童齊丘用礪希數人過亦無取焉其複名須依義訓
唯單名易諱者善矣楊公生五子彞憲文蔚知名文蔚
後登庸也

張仁龜陰責

唐張昺尚書典晉州外貯所愛營妓生一子其內子蘇
氏號塵外妬忌不敢取歸乃與所善張處士為子居江

津間常致書題問其存亡資以錢帛及漸成長教其讀書有人告以非處士之子爾父在朝官高因竊其父與處士緘劄不告而遁歸京國楊公已薨至宅門僮僕無有識者但云江淮郎君兄弟皆愕然其嫡母蘇夫人塵外泣而謂諸子曰誠有此子吾知之矣我少年無端致其父子死生永隔我罪多矣家眷聚泣取入宅齒諸兄弟之列名仁龜有文性好學脩詞應進士舉及第歷侍御史因奉使江浙於候館自經而死莫知所為先是張

處士悵恨而終必有冥訴罹此禍也柱史為楊鉅侍郎
愛壻也

裴相國及第後進業

唐相國裴公恒太和八年李漢侍郎下及第自以舉業
未精遽此叨忝未嘗曲謝座主辭歸鄆縣別墅三年肄
業不入城歲時恩地唯啟狀而已至於同年鄰於謝絕
掩關勤苦文格乃變然始到京重獻恩門文章詞采典
麗舉朝稱之後至大拜為時名相也夫世之干祿先資

名第既得之後鮮不替懈自非篤於文學省顧賓實者
安能及斯裴公廟堂之期有以見進德之無斁也

侯泳忤豆盧相

唐咸通中舉子侯泳有聲采亦士流也而闕於恭慎豆
盧珣罷相守僕射乘閒詣僧院放僕乘他適而於僧宇
獨坐皤然一叟也泳自外入門殊不顧揖傲岸據榻謂
叟曰大參長史乎叟曰非也又問曰令錄乎亦曰非也
遠州刺史乎亦曰稍高又曰少卿監乎答曰更向上侯

生矍然不安處疑是丞郎忽遽而出至門見僕御肩輿旋至方知是豆盧公也歸去後自咎悚惕貢一長牋首過賴先曾有卷投獻閣者通入泳乃自陳乖疎公亦遜謝恕其不相識也留而命酒凡勸十盃乃小懲也仍云雖不奉訝然凡事更宜在意侯生仍慚灼無以自容先是豆盧家昆弟飲清酒而已侯氏盛饌而飲此日每飲一杯迴首摘席經咀之幾不濟所謂雅責也

盧沆遇宣宗私行

賈島附

唐陝州廉使盧沆在舉場甚有時稱曾於澧水逆旅遇
宣宗皇帝微行意其貴人斂身迴避帝揖與相見沆乃
自稱進士盧沆帝請詩卷袖之乘驢而去他日對大臣
語及盧沆令主司擢第沆不自安恐僭冒之辱宰臣問
沆與主上有何階緣沆乃具陳因由時亦不訝以其文
章非叨忝也沆後自廉察入朝知舉遇黃冠犯闕不及
終場趙崇大夫戲之曰出腹不生養主司也初盧家未
嘗知舉盧相攜恥之拔為主文竟不果也 賈島遇宣

宗微行問秀才名對曰賈島帝曰久聞詩名島曰何以
知之後言於宰臣與平曾相次謫授長江尉所謂不識
貴人也

顧非熊再生

唐著作郎顧況字逋翁好輕侮朝士貶在江外多與僧
道交游時居茅山暮年有一子即非熊前身也一旦暴
亡況追悼哀切所不忍言乃吟曰老人喪愛子日暮泣
成血老人年七十不作多時別非熊在冥間聞之甚悲

憶遂以情告冥官皆憫之遂商量卻令生於況家三歲
能言冥間聞父苦吟卻求再生之事歷歷然長成應舉
擢進士第或有朝士問即垂泣而言之王定保撫言云
人傳況父子皆有所遇不知所適由此而言信有之矣

張曙起小悼

唐張祿侍郎朝望甚高有愛姬早逝悼念不已因入朝
未回其猶子右補闕曙才俊風流因增大阮之悲乃製
浣溪紗其詞曰枕障薰爐隔繡幃二年終日兩相思好

風明月始應知天上人間何處去舊歡新夢覺來時黃
昏微雨畫簾垂置於几上大阮朝退憑几無聊忽睹此
詩不覺哀慟乃曰必是阿灰所作阿灰即中諫小字也
然於風教還亦不可以其叔姪年顏相似恕之可耳諺
曰小舅小叔相追相逐謔戲固不免也

張昶尚書無忌諱

唐張昶尚書恃才直道外仍有至性及第後歸東都一
日髣髴見其亡親謂曰去得也遂辦裝入京果登朝籍

不爽陰告也東都柏坡有莊而多高大屋宇中庭有土堆若冢人言其下時有樂聲本主鬻之不售八座不信以善價買之遽令發掘其下乃麥麴耳以之和泥塗一院牆屋不假他求是知妖由人興向使疑誤神怪則有物憑焉必為村巫酒食之資也正直之人其可欺乎

荆十三娘義俠事

進士趙中行家於溫州以豪俠為事至蘇州旅止支山禪院僧房有一女商荆十三娘為亡夫設大祥齋因慕

一作趙遂同載歸揚州趙以氣耗荆之財殊不介意其日暮

友人李正朗第一作郎弟三十九愛一妓為其父母奪與諸

葛殷李悵恨不已時諸葛殷與呂用之幻惑高太尉恣

行威福李懼禍飲泣而已偶話於荆娘荆娘亦憤惋謂

李三十九郎曰此小事我能為郎報讐但請過江於潤

州北固山六月六日正午時待我李依之至期荆氏以


囊盛妓兼致妓之父母首歸於李後與趙進士同入浙

中不知所止

李當尚書亡女魂

唐李當尚書鎮興元褒城縣有處士陳休復者號陳七子狎於博徒行止非常八座以其妖誕械之於市井之間又有一休復無何殞於狴牢遽睹腐敗轄司申而瘞之爾後宛在褒城八座驚異不敢尋問一旦愛女暴亡其內子追悼成疾無以救療幕客有白八座曰陳處士真道者必有少君之術能祈之乎八座然之因敬信延召陳生曰此小事爾於初夜帷堂設燈炬畫作一門請

夫人簾下屏氣至夜分亡者自畫門入堂中行數遭夫人幅臆失聲而哭亡魂倏而滅矣然後戒勉令其抑割八座由是益敬之



北夢瑣言卷八

欽定四庫全書

子部

北夢瑣言卷

九至十一

詳校官編修

臣

曹振鏞

侍讀臣孫球覆勘

總校官原任中允臣王燕緒

校對官庶吉士臣翟樞

謄錄監生臣葉大奇

欽定四庫全書

北夢瑣言卷九

唐 孫光憲 撰

孟宏微躁妄

唐孟宏微郎中誕妄不拘宣宗朝因次對曰陛下何以不知有臣不以文字召用上怒曰卿何人斯朕耳全不知有卿翌日上謂宰臣曰此人躁妄欲求翰林學士大容易哉於是宰臣歸中書貶其官示小懲也又嘗忿狷

擠其弟落井外議喧然乃致書告親友曰懸身井半風
言沸騰尺水丈波古今常事與鄭諷鄰居諷為南海從
事因牆頽中郎一作郎中夾入牆界五六尺一作丈知宅者有
狀請退其所侵判其狀曰海隅從事少有生還地勢尖
斜打牆夾入平生操履率皆如是不遭擯棄幸矣

楊收相報楊元价

唐楊相國收貶死嶺外于時鄭愚尚書鎮南海忽一日
客將報云楊相公在客次欲見鄭尚書八座驚駭以弘

農近有後命安得此來乃接延之楊相國曰某為軍容
使楊元价所譖不幸遭害今已得請於上帝賜陰兵以
復仇欲托尚書宴犒兼借錢十萬緡榮陽諾之唯錢辭
以軍府事多許其半楊相曰非銅錢也燒時幸勿著地
榮陽曰若此則固得遵副從容間長揖而滅榮陽令於
北郊具酒饌素錢以祭之楊相猶子有典壽陽者見相
國乘白馬臂朱弓撚彤矢有朱衣天吏控馬謂之曰上
帝許我讐殺楊元价我射著其腳必死也俄而

抄本有
一中字

楊中尉暴染腳疾而殂蜀毛文錫司徒先德前潮

一作湖

牧龜範曾趨事鄭尚書熟詳其事愚於毛氏子聞之

劉山甫題天王

唐彭城劉山甫中朝士族也其先宦於嶺外侍從北歸
泊船於青草湖登岸見有北方毘沙門天王因詣之見
廟宇摧頽香燈不續山甫少年而有才思元隨張處權
請即君詠之乃題詩曰壞牆風雨幾經春草色盈庭一
座塵自是神明無感應盛衰何得卻由人是夜夢為天

王所責自云我非天王南嶽神也主張此池一作汝何
相侮俄而驚覺而風浪斗起倒檣絕纜沈溺在即遽起
悔過令撤詩牌然後已山甫自序

韋宰相功德驗

陳微附

蜀路白衛嶺多虎豹噬人有選人京兆韋亡其名唐光
化中調授巴南宰常念金剛經赴任至泥溪遇一女人
著緋衣挈二子偕行同登此山前路嶺頭行人相駐叫
譟見此女人乃赤狸大蟲也逡巡與韋分路而去韋終

不覺蓋持經之力也 成都府廣都縣人陳微自少年
常誦金剛經與胥姓馬者有隙一旦事故亡匿馬生揚
言欲追捕之陳乃礪一匕首行坐相隨儻遇馬生必能
刺之誓不受其執錄一作倖字或一日行於村路蓊薈間馬
胥伏而掩之陳抽刀一揮馬生仰倒由是獲脫至前方
悟手之所揮乃刀鞘及歸所匿處刀刃宛在本不偕行
馬胥亦無所傷何其異也

刺血寫經僧

唐咸通中西川僧法進刺血寫經聚衆教化寺所司申報高燕公判云斷臂既是凶人刺血必非善事貝多葉上不許塵埃俗子身中豈堪腥膩宜令出境無得惑人與一繩遞出東界所司不喻繩文賜錢一千送出東郭幸而誤免後卒於荊州玉泉寺

成令公擲杯琰事

荊州成令公汭唐天復中准詔統軍救援江夏舟楫之盛近代罕聞已決行期不聽諫諍師次公安縣寺有二

香虔誠冥禱勝負以求杯珎陰陽之兆凡三十擲皆不吉乃謂所信孔目官楊師厚曰卦之不吉如之何師厚對曰令公數年造船旌旗已啟中路而退將何面目回見軍民於是不得已而進竟有破陣之敗身死家破非偶然也向使楊子察人之情幸其意怠一言而止則成氏滅亡未可知也

白蓮女惑蘇昌遠

唐中和中有士人蘇昌遠居蘇臺屬邑有小莊去官道
十里吳中水鄉率多荷芰忽見一女即素衣紅臉容質
絕麗閱其明悟若神仙中人自是與之相狎以莊為幽
會之所蘇生惑之既甚嘗以玉環贈之結殷勤或一日
見檻前白蓮花開敷榮殊異俯而翫之見花房中有物
細視之乃所贈玉環也因折之其妖遂絕鬼神無形必
憑於物精氣所附非莖蕊之能哉聞於劉山甫

柳鵬舉誘五絃妓

唐龍紀中有士人柳鵬舉遊杭州避雨於伍相廟見一
女子抱五絃云是錢大夫家女僕鵬舉悅之遂誘而奔
藏於舟中為廂吏所捕其女僕自縊而死或一日卻到
柳處柳亦知其物故驚訝其來女僕具道其情因以魂
偶一作謁經時而去見劉山甫閒談中

雲芳子魂事李茵

僖宗幸蜀年有進士李茵襄州人奔竄南山民家見一
宮娥自云宮中侍書家雲芳子有才思與李同行詣蜀

具述宮中之事兼曾有詩書紅葉上流出御溝中即此
姬也行及綿州逢內官田大夫識之乃曰書家何得在
此逼令上馬與之前去李甚怏悵無可一作奈何宮娥
與李情愛至深至前驛自縊而死其魂追及李生具道
憶戀之意迨數年李茵病瘠有道士言其面有邪氣雲
芳子自陳人鬼殊途告辭而去聞於劉山甫

芻靈崇

唐文德中小京官張忘其名寓蘇臺子弟少年時在丈

人陸評事院往來為一美人所悅來往多時心疑之尋
病瘡遇開元觀吳道士守元曰子有不祥之氣授以一
符果一冥器婢子背書紅英字在空舍柱穴中因焚之
其妖乃絕聞於劉山甫

高燕公神筆

淮海小將姓朱忘其名有女未嫁為鬼物所祟常呼韓
郎往來如生人唯不見形奉外舅姑禮自云天朝神朱
以異事不敢隱秘乃告府主高燕公公唯書名俾朱歸

帖於女房門上其邪來見咨嗟言別而去聞於劉山甫

魚玄機

徐月英附

唐女道魚玄機字蕙蘭甚有才思咸通中為李億補闕
執箕帚後愛衰下山隸咸宜觀為女道士有怨李公詩
曰易求無價寶難得有心郎又云蕙蘭銷歇歸春浦楊
柳東西伴客舟自是縱懷乃娼婦也竟以殺侍婢為京
兆尹溫璋殺之有集行於世 江淮間有徐月英亦娼
者其送人詩云惆悵人間事久違兩人同去一人歸生

憎平望亭前水忍照鴛鴦相背飛

一本又有云枕前淚與階前雨隔箇閒牕

滴到

亦有詩集金陵徐氏諸公子寵一營妓卒乃焚之

月英送葬謂徐公曰此娘平生風流沒亦帶焰時號美戲也唐末有北里誌其間即孫尚書儲數賢平康狎游之事或云孫榮舍人所撰

李氏女

唐廣明中黃巢犯闕大駕幸蜀衣冠蕩析冠盜縱橫有西班牙將軍女奔波隨人迤邐達興元骨肉分散無所

依托適值鳳翔奏將軍董司馬者乃晦其門閥以身托之而性甚明敏善於承奉得至於蜀尋訪親眷知在行朝始謂董生曰喪亂之中女弱不能自濟幸蒙提挈以至於此失身之事非不幸也人各有偶難為偕老請自此辭董生驚愕遂下其山矣識者謂女子之智亦足稱也見劉山甫閒談

馮藻墓名

唐馮藻常侍肅之子涓之叔父世有科名小貂文采不

高醕愛名第已十五舉有相識道士謂曰先輩某曾入
靖觀之此生無名第但有官職也亦未之信更應十舉
已二十五舉矣姻親勸令罷舉且謀官職藻曰譬如一
生無成更誓五舉亦無成遂三十舉方就仕歷官卿監
峽牧終於騎省何浮名之引人而輕祿仕之如是也

李涪尚書改切韻

唐李涪尚書福相之子以開元禮及第亦

一作不

為小文

好著述朝廷重其博學禮樂之事諮稟之時人號為周

禮庫蓋籍於舊典也廣明以前切韻多用吳音而清青

之字不必分用涪改切韻

一有其上聲

全刊吳音當方進而

聞於宰相僉許之無何巢寇犯闕因而寢止于今無人
敢以聲韻措懷也然曾見韻銓鄙駁切韻改正吳音亦
甚覈當不知八座於此又何規製也惜哉古之製字卷
紙題名姓號曰名紙大中年薛保遜為舉場頭角人皆
體倣方作門狀洎後仍以所懷列於啟事隨啟詣公相
門號為門狀門啟雖繁於名紙各便於時也書云謹祇

候起居卽某官卽是起居在前某官在後至今顛倒無人改更矣有朝廷改之亦美事也

穆李非命

唐監察李航福相之子美茂洽暢播於時流黃巢後扶侍聖善歸東都別墅與御史穆延晦同行宿於虢州公館翌日脩謁郡牧張存卽王拱下部將也謂典客曰我受穆家恩命今穆侍御經過必須展分報答也典客詣館話於穆生因修狀謁謝張公大怒且曰此言得自何

人具以典謁為對乃斬謁者穆生驚怪失意歸館尋遣人就而害之李監察不喻方抱憂惶俄亦遇害將以滅口于時李公遶聖善所憩之牀無以求活竟同非命他日兄弟訴寃夢航謂骨肉間曰張存已得請於上帝不日即死果為拱所誅葆光子嘗讀李肇國史補曰李公沂曾放死囚他日道次遇之其人感恩延歸其家與妻議所酬之物妻嫌數少此人曰酬物少不如殺之李公急走遇俠士方免此禍常以為虛誕今張存翻害穆李

即史補之說信非虛誕也怪哉

王給事剛鯁

唐王祝給事名家子以剛鯁自任仍以所尚垂訓子孫

嫌人柔弱

一作懦

又素有物力殖利極豐黃冠前嘗典常

州京國亂離盤旋江湖甚有時望急詔徵回歸裝極厚
水陸分載行至甘棠王拱帥于是邦不式王命兇暴衆
聞以夕拜將來必居廊廟延奉勤至夕拜鄙其武人殊
不降接拱乃於內廳盛張宴席備列珍翫簾下妓樂齊

列其內子亦映簾共拱立乃斂容向夕拜曰某雖武夫
叨忝旄鉞今日多幸獲遇軒蓋經過不棄末宗願居子
姪之列即榮幸也夕拜不允堅抗再三拱勃然作色曰
給事王程有限不敢淹留俄而罷宴處分兩轄速請王
給事離館暗授意旨並令害之一家上下悉投黃河獲
其囊三四百籠以舟行沒溺聞奏朝廷多故舍而不問
夕拜有一子此際行至襄州無故投井而卒雖陝帥狂
暴亦未喻天意也徐光子曰剛有立事時有用舍以柔

濟剛不爽權變當衰亂之世須適時之宜王公儻受其
致敬庸何傷哉但卻其賂即善也履尾滅族悲夫

裴楊操尚

唐楊收段文昌皆以孤進貴為宰相率愛奢侈楊相女
適裴坦長子嫁資豐厚什器多用金銀坦尚儉聞之不
樂一日與國號及兒女輩到新婦院臺上用碟盛果實
坦欣然視碟子內乃卧魚犀遽推倒茶臺拂袖而出乃
曰破我家也他日收相果以納賂竟至不令宜哉

出腹不生養盧侍郎

盧氏衣冠第一歷代未嘗知舉乾符中盧攜在中書款
宗人無掌文柄乃擢羣從陝虢觀察使盧渥知禮闈是
歲十二月黃巢犯闕僖皇播遷舉子星散迨收復京都
裴贄連知三舉渥有羨色趙崇大夫戲之曰閤下所謂
出腹不生養主司也

一本無養字

張興師決門僧

唐相國張濬二子一曰義師即小字也本名格為蜀相

一日興師忘其名後號李將軍名儼與父達軍機於淮海亦遇害也格與興師昆弟俊邁而尚矯譎皆有父風興師幼年出宅門見其門僧忘其名傳相國處分七答之其僧邂逅莫知何罪俄而相國召僧坐安見其詞色不憚因問之僧以郎君傳相國處分見怪未知罪名相國驚駭慚謝以兒子狂駭幸師慈悲回至堂前喚興師怒責之且曰汝見僧何罪而敢造次對曰今日雖無罪過想其向來隱惡不少是以答之相國不覺失笑

此卷第十九條載陝虢觀察使盧渥與八卷陝州廉
使盧沆事同疑沆渥自是一人孫氏偶不照而重出
耳

北夢瑣言卷九

欽定四庫全書

北夢瑣言卷十

唐 孫光憲 撰

狄右丞鄙著紫僧

僧鸞附

唐狄歸昌右丞愛與僧游每誦前輩詩云因過竹院逢
僧話略得浮生半日閒其有服紫袈裟者乃疎之鄭谷
郎中亦愛僧用比蜀茶乃曰蜀茶與僧未必皆美不欲
舍之僧鸞有逸才而不拘檢早歲稱卿御謁薛氏能

尚書於嘉州八座以其顛率難為舉子乃俾出家自於
百尺大像前披剃不肯師於常僧也後入京為文章供
奉賜紫柳玼大夫甚愛其才租庸張相亦曾加敬盛言
其大用由是反初號鮮于鳳脩刺謁柳公公鄙之不接
又謁張相張相亦拒之於是失望而為李鋌江西判官
後為西班小將軍竟於黃州遇害

張翺輕傲

李堅白蔣貽恭附

唐乾寧中宿州刺史陳璠以軍旅出身擅行威斷進士

張翺恃才傲物席上調璠寵妓張小泰怒而揖起付吏責其無禮狀云有張翺兮寓止淮陰來綺席兮放恣胸襟璠益怒云據此分析合喫幾下翺云只此兩句合喫乎三下五下切求一笑宜費乎千金萬金金鞭響背十三長逝惜其恃才而取禍也出劉山甫閒談詞多不載蜀綿州刺史李忘其名時號嗑咀以軍功致郡符好賓客有酒徒李堅白者麓有文筆李侯謂曰足下何以名為堅白對曰莫要改為士元亮君雄是權耶又有蔣

貽恭者好嘲詠頻以此痛遭擯楚竟不能改蜀中士子
好著襪頭袴蔣謂之曰仁賢既裹將仕郎頭為何作散
子蔣腳他皆類此蔣生雖嗜嘲詠然談笑儒雅凡遭譏
刺皆輕薄之徒以此縉紳中咸惡之
近聞官至令佐
而卒斯亦幸矣

劉李愚甥

唐劉瞻相公有清德大名與弟阿初皆得道已入仙傳
先婚李氏生一子即劉贊也相國薨後贊且孤幼性甚
惜一作魯鈍教其讀書終不記憶其舅即李殷衡侍郎也

以劉氏之門

一作子

不可無後常加楚箠終不長進李夫

人慈念不忍苦之歎其宿分也一旦不告他適無以訪
尋聖善憶念淚如縷縻莫審其存亡數年方歸子母團
聚且曰因入嵩山遇一白衣叟謂曰與汝開心將來必
保聰明自是日誦一卷兼有文藻擢進士第梁時登朝
充崇政院學士預時俊之流其渭陽李侍郎充使番禺
為越王劉氏所縻為廣相而薨僕與劉贊猶子慙通熟
自言家世合有一人得道矣即白衣叟其髣髴乎

李鵬遇桑道茂

唐盛唐縣令李鵬遇桑道茂曰長官只此一邑而已賢
郎二人大者位極人臣次者殆於數鎮子孫百氏後如
其言長男名石出將入相子孫兩世及第至今無間次
即諱福敷歷七鎮終於使相凡八男三人及第至尚書
給諫郡牧見有諸孫皆朱紫不墜士風何先見之妙如
是

孔侍郎借油衣

唐孔拯侍郎作遺補時朝回遇雨不齎油衣乃避雨於坊叟之廡下滂注愈甚已過食時民家意其朝飢延入廳事俄有一叟烏帽紗巾而出迎候甚恭因備酒饌一精珍乃公侯家不若也孔公慚謝之且借油衣叟曰其寒不出熱不出風不出雨不出未嘗置油衣然已令鋪上取去可以供借也孔公賞羨不覺頓忘宦情他日說於僚友為大隱之美也古之富者擬於封君洪範五福一曰富先賢以無事當貴豈斯人之徒耶復有一丞

郎馬上內逼急詣一空宅逕登溷軒斯乃大優穆刀綾空屋也優忽至丞郎慚謝之優曰侍郎他日內逼但請光訪人聞之莫不絕倒

前賢戲調

唐裴晉公度風貌不揚自謨真讚云爾身不長爾貌不揚胡為而將胡為而相幕下從事遜以美之且曰明公以內相為優公笑曰諸賢好信謙也幕僚皆悚而退李洸者渤海人昆仲皆有文章洸因旅次至江村宿於民

家見覆斗上安錫佛一軀洸詭詞以贊之民曰偶未慶
贊為去僧院地遠爾洸曰何必須僧只我而已民信之
明發隨分具齋餐炷香虔誠洸俯仰朗稱曰錫鑑佛子
柔軟世尊斗上莊嚴為有十升功德念摩訶般若波羅
密又趙璘員外為裴坦相漢南從事璘甚陋裴公戲之
曰趙公本不醜孩抱時乳母憐惜往往撫弄云作醜子
作醜子因此一定趙公大哈薛侍郎昭緯氣貌昏濁杜
紫微脣厚溫庭筠號溫鍾馗一作變不稱才名也薛侍郎

未登第前就肆買鞋鞋主曰秀士腳第幾對曰與昭緯作腳來未曾與立行第也杜德祥侍郎昆弟力困要舉息利錢濟急用召同坊富民到宅且問曰子本對是幾錢其人拂袖而出又孔昭緯拜官教坊優伶繼至各求利市石野猪獨先行到公有所賜謂曰宅中甚闕不得厚致若有諸野猪幸勿言也復有一伶繼來公索其笛喚近階指笛竅問之曰何者是浣溪紗孔籠子笛伶大笑之又道士陳子霄登華山上方偶有顛仆宇文翰郎

中致書戲之曰不知上得不得且怪玄之又玄斯皆清
賢雅戲以之羣居又何傷也

京兆府鵓挽鈴

唐溫璋為京兆尹勇於殺戮京邑憚之時聞挽鈴聲俾
看架下不見有人凡三度挽掣乃見鵓一隻尹曰是必
有人探其雛而訴寃也命吏隨鵓所在捕之其鵓盤旋
引吏至城外樹間果有人探其雛尚憩樹下吏乃執之
送府以禽鳥訴寃事異於常乃斃捕雛者而報之

天帝召慕容

唐僖宗朝翰林待詔滑能慕容甚高少逢敵手有一張
小子年僅十四來謁覓慕容請饒一路滑生慕容思甚遲沈
吟良久方下一子張生隨手應之都不介意仍於庭際
取適候滑生更下又隨手著應之一旦黃冠犯闕僖宗
幸蜀滑以待詔供職謀赴行在欲取金州路入辦裝挈
家將行張生曰不必前邁慕容非慕容天帝命我取公著
慕容請指揮家事滑生驚愕妻子啜泣奄然而逝他日京

都共知也昔顏回卜商為地下脩文郎又李長吉為帝
召撰樂府豈斯類耶所言天帝者非北極天皇大帝也
按真誥又非北方玄天黑帝道君此鬼都北帝又號鬼
帝世人有大功德者北帝得以辟請四明公之流是也
召慕之命乃酆宮帝君乎與真誥髣髴故梗槩而言之

梁趙意醫

醫者意也古人有不因切脉隨知病源者必愈之矣唐
崔魏公鎮渚宮有富商船居中夜暴亡迨曉氣猶未絕

鄰房有武陵醫士

一作工

梁新聞之乃與診視曰此乃食

毒也三兩日得非外食耶僕夫曰主公少出船亦不食
於他人梁新曰尋常嗜食何物僕夫曰好食竹雞每年
不下數百隻近買竹雞併將充饌梁新曰竹雞吃半夏
必是半夏毒也命搗薑捩汁折齒而灌之由是方蘇崔
魏公聞而異之召到衙安慰稱獎資以僕馬錢帛入京
致書朝士聲名大振仕至尚醫奉御有一朝士詣之梁
奉御曰何不早見示風疾已深矣請速歸處置家事委

順而已朝士聞而惶遽告退策馬而歸時有鄜州馬醫
趙鄂者新到京都於通衢自榜姓名云攻醫術士此朝
士下馬告之趙鄂亦言病已危與梁生所說同矣謂曰
只有一法請官人剗吃消梨不限多少時咀齧不及捩
汁而飲或希萬一此朝士又策馬歸以書筒質消梨馬
上旋齧到家旬日唯喫消梨頓覺爽朗其恙不作卻訪
趙生感謝又訪梁奉御具言得趙生教也梁公驚異且
曰大國必有一人相繼者遂召趙生資以僕馬錢帛廣

為延譽官至太僕卿

療疑病

元頑博士話唐時中表間有一婦人從夫南中効官曾誤食一蟲常疑之由是成疾頻療不愈京城醫者忘其姓名知其所患乃請主人姨姪中謹密者一人預戒之曰今以藥吐瀉但以盤盂盛之當吐之時但言有一小蝦蟆走去然切勿令娘子知之是誑語也其姪僕遵之此疾永除又說有一年少眼中常見一小鏡子醫工趙

卿診之與少年期來晨以魚膾奉候少年及期赴之延
於閣子內且令從容俟客退後方得攀接俄而設臺于
上施一甌芥醋更無他味卿亦未出迨日一作中久候
不至少年飢甚且聞醋香不免輕啜之逡巡又啜之覺
胸中豁然眼花不見因竭甌啜之趙卿探知方出少年
以啜醋慚謝卿曰卽君啜鱠太多非醬醋不快又有魚
鱗在胸中所以眼花適來所備醬醋只欲卽君因飢以
啜之果愈此疾烹鮮一作鱗之會乃權誑也請退謀餐他

妙多斯類也非庸醫所及也凡欲以倉扁之術求食者
得不勉之哉

非意致禍

唐時杜彥林為朝官一日馬驚蹶倒踏鐙既深抽腳不
出為馬拖行一步一踏以至于卒古人云乘船走馬去
死一分是知跨御常宜介意也杜相審權弟延美亦登
朝序乘馬入門為門楣所軋項頸低曲伸脰前引肩高
於頂乃一生之疾也荊州文獻王好馬不惜千金沒世

不遇周先帝命內臣李廷玉賜馬與南平王且問所好
何馬乃曰良馬千萬無一若駿者即可得而選苟要坐

下坦

一作且

穩免勞控制唯駟庶幾也既免蹄齧不假銜

枚兩軍列陣萬騎如一苟未經駟亂氣狡憤介胄在身
與馬爭力罄控不暇安能左旋右抽舍轡揮兵乎自是
江南蜀馬往往學駟甚便乘跨是知蹠蹠者誇於目馴
柔者便於身此

一作比

君子之難逢假翦剔者抑其次也

哉

崔樞食龍子

唐崔樞為小朝官家人於井中汲得一魚樞本好鮮食
意是厨人治魚誤落井中乃令烹而啖之忽夢為冥官
領過讀判云人間小臣輒食龍子所有官爵並削除後
一年卒樞甚有聲不躋顯位誤有所食豈命也夫

薛準陰誅

唐薛準官至員外郎喪亂後不養繼母盤桓江淮間道
門寄榻游江南至吉州問阜觀遇脩黃籙齋道士升壇

行法事準亦就列忽失聲痛叫云中箭速請筆硯口占
一詩曰蓋國深恩不易讐又離繼母出他州誰知天怒
無因息積惡終身乞命休頃便卒天復辛酉年事斯人
也必有隱慝而致陰誅古者史籍皆以至孝繼母聞於
列傳蓋以常人難行而已能行即親母可知也豈可以
繼母而同行路哉薛死倉卒可用垂戒也

崔雍食子肉

李侶蘇循附

唐咸通中龐勛反於徐州時崔雍典和州為勛所陷執

到彭門雍善談笑遜詞以從之冀紓其禍勛亦見待甚厚其子少俊飲博擊拂自得親近更無阻猜雍以失節於賊以門戶為憂謂其子曰汝善狎之或得方便能傳刃乎人皆有死但得其所吾復何恨其子承命密懷利刃忽色變身戰勛疑訝因搜懷袖得匕首焉乃令烹之翌日召雍赴飲一作飯既徹問雍曰肉美乎對曰以味珍且飽勛曰此即賢郎肉也亦命殺之後黃巢入廣州執節度使李侶隨軍至荊州令侶草表述其所懷侶曰某

骨肉滿朝世受國恩腕即可斷表終不為尋於江津害
之唐宋蘇循尚書諂一作諂媚苟且梁太祖鄙之他日至
并門謁晉王時張承業方以匡復為意而循忽獻晉王
畫勅筆一對承業愈鄙薄之與夫雍侶為人視蘇循誠
遠矣

王迪車轍事

王迪舍人早負才業未卜騫翔一日謁宰相杜太尉於
宅門十字通衢街路稍狹有二牛車東西交至迪馬夾

在其間馬驚仆而臥為車轍輾靴鼻踰寸而不傷腳指三日後入拜翰林雖幸而免亦神助也

杜孺休種青蓮花

唐韓文公愈之甥有種花之異聞於小說杜給事孺休典湖州有染戶家池生青蓮花刺史致書問染工曰我家有三世治靛瓮常以蓮子浸於瓮底俟經歲年然後種之若以所種青蓮子為種即為紅矣蓋還本質又何足怪乃以所浸蓮子寄奉之道士田匡圖親看此花為

愚話之愚見今一作人以雞糞和土培芍藥花叢其淡紅

者悉成深紅染之所言益信矣哉蜀王先主將晏駕其
年峨嵋山娑羅花悉開白花又荊州之獻王未薨前數
年溝港城隍悉開白蓮花一則染以氣類一則表於凶
兆斯又何哉

嚴軍容猫犬怪

唐左軍容使嚴遵美於闐官中仁人也自言北司馬

一作

為供奉官袴衫給事無秉簡入侍之儀又云樞密使解

署三間屋書櫃而已亦無視事廳堂狀後貼黃指揮公
事乃是楊復恭奪宰相權也自是常思退休一旦發狂
手足舞蹈家人咸訝傍有一猫一犬猫謂犬曰軍容改
常也顛發也犬曰莫管他從他俄而舞定自驚自笑且
異猫犬之言遇昭宗播遷鳳翔乃求致仕梁川一作蜀
軍收降興元因徙於劔南依王先主優待甚異於青城
山下卜別墅以居之年過八十而終其忠正謙約與西
門季元為李孟也于時誅宦官唯西川不奉詔由是脫

禍家有北司治亂記八卷備載閹宦忠佞好惡嘗聞此傳偶未得見即巷伯之流未必俱邪良由南班輕忌太過以致參商蓋邦國之不幸也先是路巖相自成都移鎮渚宮所乘馬忽作人語且曰蘆荻花此花開後路無家不久及禍然畜類之語豈有物憑之乎石言於晉殆斯比也

竇家酒炙地

唐宗賢竇公家罕有名第璟僕射先人不善治生事力

甚困京城內有隙地一段與大閹相鄰閹貴欲之然其地止值五六百千而已竇公欣然以此地奉之殊不言地價乃曰將軍所便不敢奉違某有故欲往江淮上希三兩處護戎緘題其閹喜而致書凡獲三十緡由是幸濟東市有隙地一片窪下渟汙乃以廉值市之俾妳嫗將煎餅盤就彼誘兒童若拋磚瓦中一紙標得一箇餅兒童奔走拋磚瓦博煎餅不久十分填其六七乃以好土填之起一店停波斯日獲一緡他皆倣此由是致富

延客朝士時皆謂之輕薄號為酒炙地亦能為人求名
第酒食聚人亦希利之一端也竇回竇雍無文藝而取
名蓋飲啗之力也得於元中凡數賢御史臺記說裴明
禮買宅事與竇氏同疑竇效裴之為也

李昌符詠婢僕

唐咸通中前進士李昌符有詩名久不登第常歲卷軸
怠於裝修因出一奇乃作婢僕詩五十首於公卿間行
之有詩云春娘愛上酒家樓不怕歸遲總不留推道那

家娘子臥且留教住待梳頭又云不論秋菊與春花個
個能噉空肚茶無事莫教頻入庫一名閒物要些些諸
篇皆中婢僕之諱浹旬京城盛傳其詩篇為妳嫗輩怪
罵騰沸盡要搗其面是年登第與夫桃杖虎靴事雖不
同用奇即無異也

鍾大夫知命丹效

唐廣南節度使下元隨軍將鍾大夫忘其名晚年流落
旅寓一作陵州多止佛寺有仁壽縣主簿歐陽術愍其

衰老常延待之三伏間患腹疾臥於歐陽之家踰月不食歐主簿慮其旦夕溘然欲陳牒州衙希取鍾公一狀以明行止鍾公曰病即病矣死即未也既此奉煩何妨申報於是聞於官中爾後疾愈葆光子時為郡倅鍾公惠然來訪因問所告之由乃曰曾在湘潭遇干戈不進與同行商人數輩就嶽麓寺設齋寺僧有新合知命丹者且云服此藥後要退即飲海藻湯或大期將至即肋下微痛此丹自下便須指揮家事以俟終焉遂各奉一

緡吞一九他日入蜀至樂溫縣遇同服丹者商人寄寓
樂溫得與話舊且說所服之藥大效無何此公來報肋
下痛不日其藥果下急區分家事後凡二十日卒某方
神其藥用海藻湯下之香水沐浴卻吞之昨來所苦藥
且未下所以知未死兼出藥相示然鍾公面色紅潤強
飲啗似得藥力也他日不知其所終以其知命有驗故
記之

成都覺性院有僧合
此藥賣之人多服也

北夢瑣言卷十

欽定四庫全書

北夢瑣言卷十一

唐 孫光憲 撰

張直方譽裴休

唐金吾大將軍張直方西班倜儻勲臣也好接賓客歌妓絲竹甲於他族與裴相國休相對相國始麻衣就試執金慕其風采因裴造謁執金欸待異禮他日朝中盛稱裴秀才文藝朝賢訝之相國恐涉雜文不遑安處自是不敢更

歷其門執金甌名不往或曰裴秀才方謀進取慮致物譽
非是偃蹇一日又召傳語曰若不妨及即更奉薦裴益悚惕
薛侍郎紙裏鷄子

唐薛昭緯侍郎恃才與地鄰於傲物常以宰輔自許切
於大拜于時梁太祖已兼四鎮兵力漸大有問鼎之心
速於傳禪薛公銜命梁國一作園梁祖令客將約回乃謂

謁者曰大君有命無容却回速轡前邁既至夷門梁祖
不獲已須出迎接見薛公標韻詞辯方始改觀自是宴

接莫不欵曲一日梁祖話及鷹鷄薛公祇對盛言鷲鳥
之俊梁祖欣然謂其亦曾放弄歸館後傳語送鷲子一
頭薛生致書感謝仍對來人戒僮僕曰令公所賜真一作
直須愛惜果一作以紙裹安鞵袋中來人失笑聞於使
衙

進士團所由倒罰崔狀元

唐進士崔昭矩為狀元有進士團所由動靜舉罰一日
所由疎失狀元答之逡巡所由謝伏一作于階前對諸

進士曰崔十五郎不合於同年前面瞋決所由請罰若
干博陵無言以對

程賀為崔亞持服

唐崔亞郎中典眉州程賀以鄉役差充廳子其弟在州
曾為小書吏崔公見賀風味有似儒生因詰之曰爾公
讀書乎賀降階對曰薄涉藝文崔公指一物俾其賦詠
雅有意思處分令歸選日裝寫所業執贄甚稱獎之必
稱進士依崔之門更無他岐凡二十五舉及第每入京

館於博陵之第常感提拔之恩亞卒之日賀為崔公縑
服三年人皆美之

高太尉駢請留蠻宰相事

唐南蠻侵軼西川苦無亭障自咸通已後劍南苦之牛
叢尚書作鎮為蠻寇憑陵無以抗拒高公自東平移鎮
成都蠻酋搏蜀城掌武先選驍銳救急人背神符一道
蠻覘知之望風而遁爾後僖宗幸蜀深疑作梗乃許降
公主蠻王以連姻大國喜幸逾常因命宰相趙隆眉楊

奇鯤段義宗來朝行在且迎公主高太尉自淮海飛章
云南蠻心脅唯此數人請止而鳩之迄僖宗還京南方
無虞用高公之策也楊奇鯤輩皆有詞藻途中詩云風
裏浪花吹又白雨中嵐色洗還青江鷗聚處窻前見林
狖啼時枕上聽此際自然無限趣王程不敢暫留停甚
清美也

夏侯相以術而殂

唐相國夏侯公孜富貴後得彭素之術甚有所益出鎮

蒲中悅一娼妓不能承奉以致尾閭之泄因而致卒有
夏侯長官者本反初僧也曾依相國門庭亂離後挈家
寄於鳳州山谷尋亦物故惟寡妻幼子而已夏姬獻此
術於節使滿存相公大獲濡濟其子名籍學吟詩入西
川依託勲臣為幕下從事時人號為夏侯驢子乃世濟
其鄙猥也僕聞之於強山人甚詳亦嘗與籍相識籍子
壻羅嶠與僕相知亦多蓄姬妾疑其染夏氏之風然夏
侯長官者得非相國之師乎

張金吾威勢取術

唐金吾大將軍張直方一旦開筵命朝士看乾水銀點
制不謬衆皆歎羨以謂清河曾遇至人良久張公大笑
曰已非所能有自來矣頃任桂府團練使逢一道士蘊
此利術就而求之終不可得乃令健卒縛於山中以死
脅之道士驚怕但言藥即多獻術則不傳唯死而已由
是得藥縱其他適今日奉呈唯成丹也非已能也

蔡旼虛誕

何法成附

唐高駢鎮成都甚好方術有處士蔡旼者以黃白干之
取瓦一片研丹一粒半塗入火燒成半截紫磨金乃奇
事也蔡生自負人皆敬之以為地仙燕公求之不得久
而垂露乃是得藥於人眩惑賣弄為元戎咎殺之王先
主時有何法成者小人也以賣符藥為業其妻微有容
色居在北禪院側左院有毳衲者因與法成相識出入
其家令賣藥銀就其家飲啗而已法成以其內子餌之
而求其法此僧秘惜遷延未傳乃令其妻冶容而接之

法成自外還家掩縛欲報巡吏此僧驚懼因謬授其法
并成藥數兩釋縛而竄法成聞一作得此術以致發狂大

言於人誇解利術未久聞於蜀後主召入苑中與補軍
職然不盡僧法他日藥盡遽屬更變伶俜而已偶免謬
妄之誅也彭韜光者與何生切鄰兼得其事為余話之

申屠別駕術禍

高駢鎮維揚有申屠別駕懷至術為呂用之譖毀一旦
作竄燕公命吏齎長限牒所在尋捕至襄州禪院中遇

之擒得申生寄襄獄執維申生告獄吏要見督郵韋公
吏以告之韋遽面見屏人曰某身上有化金藥欲獻元
戎劉公巨容可乎韋審之遂非時入謁因得道達點輒
瓦半葉以呈之劉公歎訝乃虛以判獄而匿之僖皇在
蜀降天使至峴山即田令孜弟也劉公乘醉將藥金誇
街於中使中使迴聞於田中尉洎劉司空朝覲行在與
申生偕往藏隱此人不令他適田軍容銜之於導江莊
加害劉申皆不幸也有一子號申司馬居朗州尚存點

永樂在身荆南節判司空董太監得申生四粒藥點四

永奉一百千以慰好奇之心也

王蜀時有一士著綠布衫常在街衢仍棲逆旅

巡使蕭懷武欲求其術堅確不與遂於馬院打殺之蓋不能慎持所致也

宗小子藥妖

唐世長安有宗小子者解黃白術唯在平康狎游與西川節度使陳敬瑄微時游處因色失歡他日陳公遭遇出鎮成都京國亂離僖皇幸蜀宗生避地亦到錦江然畏潁川知之遂旅遊資中郡銷聲斂跡惟恐人知寓應

真觀修一爐大丹未竟宗生解六壬每日運式看一日
吉凶無何失聲便謀他適走至內江縣潁川差人吏就
所在害之所修藥道士收得傳致數家皆不利人莫知
何也

李璧尚書戮律僧

唐李璧尚書出鎮東川有律僧

一作師

忘其名臨壇度人

四方受具者奔走師仰檀施雲集由是鞅掌嗜慾之心
熾焉一旦發露前後女童為尼者呈身之物殆一百四

十五人八座戮之葆光子嘗見同僚王行軍說幽州有
壇長近八十歲即都校之元昆也每歸俗家以其衰老
令小青扶持因而及亂遂要反初以青為偶乃謂偶曰
平生不謂有此歡暢悔知之晚也軍府怪而笑之僕有
門徒僧不欲斥其名經論甚博未有乖露他日預臨壇
之列尼輩參請號曰依止自是醜聲盈耳亦不以為耻
嗚呼如來制戒為入道之門苟非其人反為聚淫叢藪
信乎道不虛行也

一本作律乎律
乎道不虛行

崔元亮降雲鶴

趙駕仙何景冲梁威儀附

唐崔元亮曾典眉州每公退具簡履以朝太上焚脩精
至不舍晝夜嘗於州衙開黃籙道場為民祈水旱疾疫
而已散齋之晨必降祥雲鸞鶴州民咸覩亮典湖州脩
齋亦降仙鶴
太白為贊至今眉州每歲設黃籙齋凡執一作事軍校及茶

酒廝役祇承皆知齋法次第道士羅昭然壽一百一十
三歲預崔牧之齋席跨驢出街墜驢而腳在鐙內因拖
曳而死也又王蜀時玉局觀道士趙駕仙上官道士

忘其名住青城山脩齋入壇行法事其廝僕卧而驚魘
問師何在人問之乃曰適見四人著緋自天而下曳二
道士於壇前鞭背二十問者止之令勿言比趙駕仙與
上官道士相次患發背而斃又有何景沖作道門威
儀好食蒜上壇行法事時有蒜氣後於青城脩齋度江
船覆溺死斯蓋罔道不恭為天罰也 咸中令鎮荆南
請道士梁威儀行法事俯伏奏章頓首存想因之不起
乃醉睡也成公斤之毀廢道場斯亦何趙之流也大約

荆湘僧道赴齋皆恣洪飲俚人不以為非欲求降鑒安
可得也

關三郎入關

唐咸通亂離後坊巷訛言關三郎鬼兵入城家家恐悚
懼其患者令人寒熱戰慄亦無大苦弘農楊玘挈家自
駱谷路入洋源行及秦嶺回望京師乃曰此處應免關
三郎相隨也語未終一時股慄斯又何哉夫喪亂之間
陰厲旁作心既疑矣邪亦隨之關妖之說正謂是也愚

幼年曾省故里傳有一夷迷鬼魔人間巷夜聚以避之
凡有窻隙悉皆塗塞其鬼忽來即撲人驚魔須臾而止
希慕求進

唐自大中後進士尤盛封定鄉丁茂珪場中頭角舉子
與其交者必先登第而二公各二十舉方成名何進退
之相懸也先是李都崔雍孫瑄鄭嵎四君子蒙其盼睐
者皆因進昇故曰欲得命通問瑄嵎都雍葆光子曰士
無華腴寒素雖瓊意琦行與學雄文苟不資發揚無以

昭播是則希顏慕蘭馳騁利名者不能免也

垂血淚


唐進士殷保晦妻封夫人皆中朝士族也殷公歷官臺省始舉進士時文卷皆內子為之動合規式中外皆知良人倜儻疎放善與人交未嘗以文章為意黃寇犯闕夫妻遭難初封夫人就刃殷公失聲雙血被面其從母為尼親見其禍泣言於姻親愚於殷之中表聞之方信古人云淚盡繼之以血哀痛之極也

心疾不妨文章

李氏子附

唐世劉崇望弟兄五人內四人皆登進士第仕至將相
丞郎其元昆崇彝不及第官至省郎生五男每院各與
一人為後崇彝留一男少有才思一旦心疾唯染翰章
制誥褒貶朝中卿相咸撫其實骨肉間懼聞于外旋取
燼之宛為掌誥之美竟廢于時鄙夫蜀鄉與前簡刺李
詠使君有分隴右有一子年十四掌握管草詞指揮天
曹地府陰隙之事落翰如飛家君憂懼亦苦戒之此子

乃曰但為我父勿預我事他日墜井而死心為靈臺既
嬰風恙而才思倫序斯又何哉



北夢瑣言卷十一